

Sed hoc quam sit verum et rationi consentaneum, ex dictis in secunda sectione constat. Nam, licet de merito fundato in actibus, in quibus homo non operatur quantum potest, nec facit totum quod in se est, magis sit controversum, ac dubium, an statim detur augmentum illi respondens, tamen de merito illorum actuum, in quibus homo facit totum quod in se est, nulla videtur esse posse ratio dubitandi. Præsertim quia etiam de merito actuum remissorum verisimilius est statim habere effectum augmenti gratiæ sibi respondentis, quia meritum de se est sufficiens causa præmii.

6. Quarto, ex eisdem principiis potest amplius explicari hæc perfectio; nam ex illis manifeste sequitur B. Virginem in fine vitæ suæ potuisse tot gradus gratiæ uno actu mereri, quot in toto tempore superioris vitæ, per omnes actus, et modos sanctificationis et augmenti ejus, fuerat consecuta. Quia ille actus eliciebatur ab actu sic intenso, ex tota virtute et efficacia sua, et ex toto conatu, et auxilio sibi proportionato; ergo merebatur per talem actum tot gradus gratiæ et charitatis, quot antea habebat, vel certe plures; ergo multiplicando hujusmodi actus, pene immensus et incomprehensibile erit tale augmentum.

7. *Objectio.* — *Responsio.* — *Objectio.* — *Responsio.* — Contra hanc assertionem nihil invenio quod possit difficultatem parere, nisi fortasse quod aliquibus videri poterit incredibile tale ac tantum augmentum, quia excellentiam ac magnitudinem ejus capere non possunt. Si tamen quis consideret Deiparæ dignitatem pene infinitam, et initium sanctificationis ejus, quod fundamentum habuit in montibus sanctis, seu in culmine sanctitatis, et progressum vitæ ejus admirabilis ac divinæ, non hæsitabit ob admirationem; sed facile (ut existimo) intelliget totam hanc gratiæ perfectionem optime in B. Virginem convenire. Dices: hinc sequi videtur, quemlibet justum, vel sanctum, si aliquo tempore mendo perseveret, præsertim postquam ad perfectionem pervenit, brevi tempore posse consequi ingens gratiæ augmentum; nam principia posita eadem fere proportione applicari possunt. Respondetur non esse similem rationem, primo, quia reliqui semper habent impedimentum fomitis, et raro operantur secundum totam latitudinem habuum, præsertim si sint valde intensi. Deinde etiam, cum ad eam perfectionem deveant, vix attingunt primam gratiam, quam

vel B. Virgo, vel primus Angelus in sua prima sanctificatione obtinuerunt.

8. *Augmentum charitatis et gratiæ Virginis in fine vitæ quantum.* — Dico secundo: probabiliter credi potest B. Virginem consecutam esse plures gradus gratiæ et charitatis, quam sint in omnibus sanctis hominibus et Angelis, etiam collective sumptis; itaque si mente concipiamus ex multitudine gratiarum Sanctorum omnium unam intensissimam gratiam consurgere (quod solum explicandæ rei gratia dictum sit), non adæquaret intensionem gratiæ Virginis. Conclusio hæc ab Scholasticis antiquisque scriptoribus non disputatur, et ideo fortasse in terminis a nemine reperiatur asserta, sicut etiam neque negata est, neque improbata; fit tamen probabilis et verisimilis, tum testimoniosis et conjecturis adductis in prima conclusione, tum etiam iis quas nunc adjiciemus. Primum enim Sancti Patres, ubique loquuntur de gratia Virginis et gloria (perinde namque est), tam magnifice de ea sentiunt et loquuntur, ut non solum predictam perfectionem, sed majorem etiam illi tribuere videantur. Ildephonsus, ser. 2 de Assumpt.: *Sicut est incomparabile quod gessit, et ineffabile quod percepit, ita est incomprehensibile præmium gloriæ, quod meruit.* Andreas Cretensis, sermon de Dormitione Deiparæ, tales ac tantum dicit esse statum gloriæ Virginis, *ut quia nec discerni possit, honoretur silentio.* Et infra: *Quæ habes cum aliis non comparabilem appellationem, quæ excepto Deo solo es omnibus altior.* Ac denique concludit: *O sancta, et sanctis sanctior, et omnis sanctitatis sanctissime thesaure.* Petrus Damianus, serm. de Assumpt.: *Virgo, inquit, inter animas Sanctorum et Angelorum choros supereminens, et erecta, merita singulorum et omnium titulos antecedit;* ubi illæ duæ particulæ, *singulorum, et omnium,* energiam aliquam habere videntur; et ibidem, ita dicit superare Virginem alios Sanctos in gratia, sicut sol in luce et claritate stellas excedit; ac tandem de eadem Virgine sic loquitur: *In illa inaccessibili luce perlucens, sic utrorumque spirituum habebat dignitatem, ut sint quasi non sint, et comparatione illius nec possint ne debeat apparere.* Et serm. de Nat. Virg.: *Quid grandius Virgine Maria, quæ magnitudinem summæ divinitatis intra sui ventris conclusit arcanum?* Attende Seraphim, et videbis quidquid majus est, minus Virgine, solumque opificem opus istud supergredi; et infra: *Gloria, quæ eam ex hoc mundo transeuntem exce-*

pit, principium ignorat, nescit finem, de qua nihil aliud possumus dicere, nisi quia gloriosa dicta sunt de te gloria Dei. Et serm. de Annunt.: *Hæc est in quam dulcis Dominus cum omni sua dulcedine supervenit. Cum enim fecerit Deus omnia opera sua valde bona, hoc melius fecit, consecrans sibi in ea reconciliatorium aureum.* Damascenus, orat. 1 de Dormit. Virg., satis post medium: *Dei matris, inquit, et servorum Dei infinitum est discrimen.* Chrysostomus, in liturgia, primum negat aliquid esse in tota rerum universitate, quod cum B. Virgine comparari queat. Deinde eam vocat *incomparabiliter gloriosiorem quam Seraphim.* Et in sermone quem Ecclesia refert in festo Nativ. B. Virg.: *Magnum revera miraculum, fratres dilectissimi, fuit semper B. Virgo Maria. Quid, namque illa majus aut illustrius ullo unquam tempore inventum est, seu aliquando inveniri poterit? hæc sola calum ac terram amplitudine superavit. Quidnam illa sanctius? non Propheta, non Apostoli, non Martyres, non Patriarchæ, non Angeli, non Throni, non Dominationes, non Seraphim, non Cherubim, non denique aliud quidquam inter creatas res visibles aut invisibles majus aut excellentius inveniri potest.* Nihil ergo Chrysostomus excipit, sive B. Virgo cum singulis, sive cum omnibus Sanctis comparetur. Unde Ephrem, orat. de Laudibus Virg.: *Nulla, inquit, comparatione omnibus superis exercitibus gloriosior, præstantissimum orbis terræ miraculum, omnium Sanctorum corona ob fulgorum inaccessa.* Lauren. Justin., in ser. de Assumpt., apertius inquit: *Merito quidquid honoris, quidquid felicitatis habebatur in singulis, totum abundabat in Virgine.* Hinc Sanctorum admiratio de Maria. Anselmus, de Laudibus Virg., c. 9: *Pura sanctitas et sanctissima puritas piissimi pectoris ejus omnem omnis creature puritatem sive sanctitatem transcendentis, incomparabili sublimitate hoc promeruit, ut reparatrix perditæ orbis dignissime fieret, et cætera, quæ subjungit, quæ ad eamdem rem confirmandam plurimum valent.* Et hoc ipsum confirmat quod Bonaventura, opusc. de Laudibus Virginis, capite septimo, ex sententiis Patrum docet, Dei gloriam magis in sola Virgine quam in cæteris Dei operibus pure creatis relucere, atque adeo perfectiones omnes, in cæteris rebus divisas ac distributas, in Virgine beata excellenter modo esse congregatas. Et accommodat verba illa: *Omnia flumina intrant in mare, et mare non redundat.* Quia omnia flumina gra-

tiarum intrant in Mariam, et dignitatem ejus non excedunt. Unde, *sicut in mari, inquit, aquarum, ita in Maria sunt congregations gratiarum.* Quod Hieronymi verbis confirmat, dicentes: *Cæteris per partes præstatur, Maria vero simul se tota infudit gratiæ plenitudo.* Affert etiam id Eccl. 24: *In plenitudine Sanctorum detentio mea;* et cum Bernardo sic explicat: *Ideo in plenitudine Sanctorum Maria detentio fuit, quia in mirifica perfectione sua, plenitudo perfectionis omnium Sanctorum illi non defuit.* Quod postea declarat discurrendo per singulas virtutes, et gratiarum genera; possumus autem eadem ratione per omnes gradus gratiæ sanctificantis discurrens; horum enim collectio et congregatio multo magis ad illius perfectionem pertinet. Et ad hoc confirmandum conferre possunt, quibus supra, disp. 3, ostendimus, quidquid donorum gratiæ divisum est in reliquis Sanctis, totum fuisse collectum in Virgine. Quamobrem Hieronymus eam vocat, *hortum deliciarum, in quo condita sunt omnia florum genera, et odora menta virtutum;* et Petrus Damianus supra, locum voluptatis appellat, quem *Deus omnibus gratiæ dixiti cumulavit.*

9. *Objectio.* — *Responsio.* — Secundo principaliter, fit verisimilis conclusio variis conjecturis. Prima sumitur ex dignitate matris Dei, quæ in suo genere est infinita. Nam Deus unicuique dat gratiam accommodatam statu ac muneri suo, ut in principio hujus materie explicuimus; sed tota hæc gratiæ intensio ac plenitudo optime convenient cum dignitate matris Dei. Primo, quia illa dignitas est altioris ordinis, et suo modo infinita; unde etiamsi in infinitum illa gratia intenderetur, nunquam excederet terminos aut debitam proportionem illius dignitatis. Propter quod Euthym., ser. de Zona Virg.; et Andr. Cretens. ser. de Dormit. Deiparæ, dixerunt: *Si quid, quod nos superat, in ea divina operata est gratia, nemo miretur intuens ad novum et ineffabile, quod in ea peractum est mysterium, ab omni infinitate infinites infinite exemplum.* Ergo, cum ex divina sapientia ad certum gradum definita fuerit illa gratia, verisimile est eam esse talem, tamque perfectam, ut omnes inferiores in se quodammodo complectatur. Sicut enim Anselmus dixit, *decuisse Virginem ea puritate nitere, qua major sub Deo nequeat intelligi,* ita dicere possumus decuisse ea sanctitate et gratia perfici, qua nulla major in ulla pura creatura, neque in omnibus simul intelligatur. Et confirmatur,

294

QUEST. XXXVIII. ARTIC. IV.

quia major est dignitas matris Dei, quam munera Sanctorum omnium et dignitates, etiam in unum congregentur; ergo optime huic dignitati respondet gratia, quæ omnium aliorum gratias supereret. Propter quod Sanctus Bernardinus, ser. 45 de Festivitatibus Virg., dicit plus meruisse Mariam eo actu fidei et obedientiae, quo Angelo annuntianti filii conceptionem assentita est, et assentiendo sese condigne disposuit, ac de congruo meruit ut esset mater Dei, quam meruerint omnes Sancti omnibus actibus ac meritis suis, quia, videlicet, eo actu meruit saltem de congruo eam dignitatem, cui excellentior gratia et gloria quodammodo debetur. Et ad hoc accommodat verba illa Sapientis: *Multæ filiæ congregaverunt sibi divitias, tu supergressa es universas.* Ac tandem concludit tantam esse perfectionem Virginis, ut soli Deo cognoscenda reservetur. Dices: hac ratione probaretur, B. Virginem habuisse hanc gratiae plenitudinem, ab eo saltem instanti in quo incepit esse mater Dei. Respondetur negando consequentiam; satis est enim quod tunc habuerit totam hanc perfectionem quasi in radice, quia nondum pervenerat ad ultimum terminum perfectionis suæ; quanquam, si quis illud consequens concederet, fortasse non admundum erraret.

40. *Maria magis Christo dilecta, quam Ecclesia.* — *Amor Virginis erga Deum quantus.* — Secunda ratio esse potest, quia Deus plus amat Virginem quam reliquos Sanctos omnes; ergo plus gratiae illi confert; gratia enim respondet amori Dei erga personam quam perfecte amat. Antecedens probatur, quia talis amor videtur debitus matri. Unde Augustinus (prout refert Bonaventura, in Speculo Mariæ, c. 6, circa finem): *Quid mirum si præ omnibus diligat, quæ præ omnibus est dilecta?* Debet enim inter matrem et filium amorem mutuum esse perfectissimum, præsertim quia tali filio a tali matre talis amor debebatur; habuit autem B. Virgo omnem perfectionem quam habere debuit. Denique verisimile est B. Virginem hunc amorem et optasse et petuisse; cur ergo dubitabimus illum impetrasse? Ponderat et exaggerat hunc amorem eleganter Anselmus, 5 lib. de Excellentia Virginis, c. 4, et inter alia sic Virginem alloquitur: *Et tu, o beatissima seminarum, in quam fluxit tam copiosa et supereminens gratia omnium gratiarum, quid animi, quæso, gerebas ad eum qui tibi hæc magna fecit?* quasi dicat, habuisse amorem divino amori consentaneum.

41. *Similitudo inter gratiam Christi et Virginis.* — Tertia ratio iis non dissimilis colligi potest ex similitudine ac proportione inter Christum et Virginem. Diximus enim in priori tomo, gratiam creatam animæ Christi infusam, cum non fuerit infinita (quia esse non potuit), fuisse tamen, quantum esse potuit, proportionatam dignitati capitum, et majestati Verbi Dei, et ideo in intensione superasse omnes aliorum hominum et Angelorum gratias, etiam simul sumptas; decuit autem Virginem esse Christo simillimam et conjunctissimam; ergo in hac etiam perfectione et intensione gratiae debuit ad illius perfectionem cum debita proportione accedere.

42. *Objectio. — Responsio.* — *Maria aqueductus gratiae.* — Dices: cum hæc excellentia conveniat Christo ratione sue dignitatis, potius fit illi injurya, si Virginem ei faciamus æqualem. Respondetur: ideo diximus, cum debita proportione, non cum æqualitate; Christi enim gratia tam ipsius Virginis, quam reliquorum sanctorum Angelorum et hominum gratias etiam simul collectas plurimum superat; gratia autem Virginis solum cum aliorum Sanctorum gratiis confertur, et illas superare dicitur; et in hoc dicimus servari optimam proportionem et similitudinem. Primo quidem quia (ut Bernardus dixit, ser. de Nativitate B. Mariae) Christus in Ecclesia est tanquam fons gratiæ; B. autem Virgo, ut aqueductus; reliqui vero Sancti, ut rivuli; ergo in Christo ut in fonte congregantur omnes gradus gratiæ, qui tam ad aqueductum quam ad rivulos fluunt; in Virgine vero, ut in aqueductu congregantur omnes qui ad rivulos derivantur. Hoc enim modo, et in toto corpore Ecclesiæ est optima proportio, et inter Christum et Virginem conveniens similitudo et conjunctio.

43. *Maria omnibus salutaris et utilis.* — Deinde hinc potest quarta ratio formari. Nam, quia gratia Christi respectu omnium est gratia capitum, ideo habet illam excellentiam; sed B. Virgo participat illam dignitatem; decet ergo ut et gratia ejus illam perfectionem participet. Explicatur secunda propositio assumpta ex Sanctis Patribus, Irenæo, lib. 3 contra Hær., c. 33: *Sicut Eva inobediens facta, et sibi et universo generi humano causa facta est mortis, sic et Maria habens prædestinationatum virum, tamen Virgo obediens, et sibi, et universo generi humano causa facta est salutis;* et infra: *Eva inobedientia nodus solutionem accepit per obedientiam Mariæ; quod enim al-*

ligavit virgo Eva per incredulitatem, hoc Virgo Maria solvit per fidem. Quomodo dixit etiam Hieronymus, in Ep. ad Eustochium, de Cusodia virginitatis: *Mors per Evam, vita per Mariam.* Latius Augustinus, ser. 35 de Sanctis: *Altior cœlo est de qua loquimur, abyso profundior cui laudes dicere conamur. Hæc enim que sola meruit mater et sponsa vocari, hæc primæ matris damna resolvit, hæc homini perdito redemptionem adduxit. Mater enim generis nostri pœnam intulit mundo, genitrix Domini nostri salutem edidit mundo; auxtrix peccati Eva, auxtrix meriti Maria; Eva occidendo obsuit, Maria vivificando profuit; illa percussit, ista sanarit.* Ex quo principio inferiorius ita concludit: *Quid dicam pauper ingenio, cum de te quidquid dixerim, minor laus est quam dignitas tua meretur?* Si cœlum te vocem, altior es. Si matrem gentium dicam, præcedis; si formam Dei appellem, digna existis; si dominam Angelorum vocitem, per omnia te esse probaris. Similia multa habet ser. 11 et 17 de Nativ. Eleganter vero et copiose Petrus Chrys., ser. 140: *Quantus sit Deus, satis ignorat ille qui hujus Virginis mentem non stupet, animum non miratur. Pavet cœlum, tremunt Angeli, creatura non sustinet, natura non sufficit, et una puella sic Deum in sui pectoris capit, recipit, oblectat hospitio, ut pacem terris, cœlis gloriam, salutem perditis, vitam mortuis, terrenis cum cœlestibus parentelam, ipsius Dei cum carne commercium, pro ipsa domus exigat pensione;* et ser. 142: *Ipse, inquit, Angelus miratur, omnes homines vitam meruisse per feminam.* Hinc Bernardus, ser. 2 de Assumpt.: *Per te, inquit, accessum habemus ad filium, o benedicta, inventrix gratiæ, genitrix vitæ;* et ser. 2 Pentecostes: *Tunc, inquit, operabatur salutem nostram in medio terræ, in utero videlicet Virginis, qui mirabili proprietate terræ medium appellatur. Ad illam enim, sicut ad medium, sicut ad arcam Dei, sicut ad rerum causam, sicut ad negotium seculorum respi ciunt, et qui in cœlo habitant, et qui in inferno, et qui nos præcesserunt, et nos qui sumus, et qui sequentur; et nati natorum, et qui nascentur ab illis;* et infra: *In te Angeli letitiam, justi gratiam, peccatores veniam invenierunt in aeternum. Merito in te respi ciunt oculi totius creature, quia in te, et per te, et de te benigna manus Omnipotens, quidquid creavit, recreavit; et similia multa habet in ser. Signum magnum, et in ser. de Nativ. Marie, quibus in locis indicat nullum gratiae donum communicari hominibus,*

nisi per Mariam, et inter alia inquit: *Maria omnibus facta est, sapientibus et insipientibus copiosissima charitate se debitricem efficit, omnibus misericordiae sinum aperuit, ut de plenitudine ejus accipiant universi, captivus redemptionem, æger curationem, tristis consolationem, peccator veniam, justus gratiam, Angelus lætitiam, tota Trinitas gloriam, denique Filii persona humanae carnis substantiam, ut nemo sit qui se abscondat a calore ejus.* Subscribunt eidem sententiae S. Ephrem., orat. ad Sanctam Virginem, ubi *mediatrix et reconciliatrix* appellat; et S. Germanus, ser. de Cœna Domini; latissime Petrus Damianus, ser. de Annunt., et ser. de Assumpt., et ser. 1 de Nativ. Mariæ, quorum nonnulla verba infra afferemus, tractantes de intercessione Virginis et cultu illi debito. Si ergo omnia gratiae dona per Virginem cæteris communicantur, rationi consentaneum est ut in ipsa prius recipientur. Quod si de gratiis, vel donis, aut virtutibus (ut ita dicam) diversarum rationum, nemo hoc negabit, propter dictam causam, et alias quas in principio hujus materiæ adduximus, videtur sane, neque de gradibus et intensione gratiæ id esse negandum, cum ad perfectionem sanctitatis hoc maxime pertineat. Unde recte dixit Bonav. supra: *Quid mirum si omnis gratia ad Mariam confluavit, per quam tanta gratia ad ceteros diffusit?* Et Laur. Justin., ser. de Annunt.: *Magna, inquit, profecto fuit Mariæ gratia, exuberans atque completa, quæ cœlis dedit gloriam, terris præbuit Deum, gaudium præstítit Angelis, seculoque pacem refudit, fide docuit gentes, vitiisque finem imposuit; humanæ vite instituit ordinem, atque spiritualem edidit moribus disciplinam.* Quomodo non est Maria, iuxta Gabrieles oraculum, plena gratia, quæ effecta est mater Dei, paradisi scala, cœli janua, interventrix mundi, dæmonum fuga, peccatorum spes, Dei et hominum verissima mediatrix?

14. *Objectio.* — *Responsio.* — Quinta et ultima ratio formari potest ex præcedentibus, quia actus perfectæ charitatis, quos B. Virgo habuit in hac vita, innumerabiles fuerunt, ita ut eorum multitudo possit fortasse cum numero Sanctorum omnium conferri, quia (ut ostendimus) fere totam vitam in perpetua contemplatione transegit, in qua ferventissime Deum amabat, et hunc amoris actum frequentissime repetebat. Præterea ostendimus, non minus meruisse B. Virginem quolibet horum actuum, quam meruit supremus Angelus illo actu perfecte libero, quo meritum

suum consummavit. Unde fit consequens sæpius singulis actibus plus meruisse B. Virginem, quam singulos homines sanctos omnibus actibus vite suæ, quia meritum supremi Angeli non fuit minus perfectum quam totum meritum cuiuslibet hominis, saltem regulariter loquendo (ut abstineamus a quæstione non necessaria, an, scilicet, aliquis homo præter Virginem, majorem gratiam consecutus fuerit quam supremus Angelus); igitur, si hujusmodi actus meritorii B. Virginis adæquant numerum omnium beatorum, plane consequitur etiam gratiam ejus superare gratiam omnium illorum. Si vero numerus actuum est inferior numero Sanctorum (ut credi facile potest), compensari potest haec inæqualitas. Primo, gratia ipsa, quæ data fuit Virginis ex opere operato. Secundo, perfectione et valore singulorum actuum, nam etiam meritum primi Angeli excedit merita multorum inferiorum simul sumpta. Tertio, augmento et majore intensione ipsorum actuum; non enim fuerunt omnes inter se æquales, sed quo gratia fiebat auctior, eo actus ab illa precedentibus erant intensiores et majoris meriti, ut supra fuse declaratum est. Quæ omnia si exacte computentur, fit revera valde verisimile quod asserimus; in re enim adeo obscura, et non aperte revelata, non est quærenda major certitudo. Nec video quid possit contra hanc sententiam objici, nisi fortasse quod nova, inusitata, ac præter hominum opinionem esse videatur. Sed non est cur novum censemus sit, quod doctrinæ prisorum Patrum, non solum non adversatur, verum etiam ita ab eis insinuator, ut merito illis attribui possit, vel saltem existimari hanc esse accommodatam explicationem eorum, quæ ipsi magno verborum pondere virtute docuerunt. Accedit quod, cum ante viginti annos in Academia Salmanticensi, rogatus a gravibus viris, quæstionem hanc disputare atque definire fuerim aggressus, cumque in hanc sententiam valde propenderem, rei novitate detentus, eam proprio judicio ac sententia definire ausus non fui, donec Doctores sapientissimos, et in rebus Theologicis valde versatos consului, quibus omnibus pia atque probabilis hæc sententia visa est.

15. Poterat hoc loco disputari quid amplius præter gratiæ perfectionem B. Virgo sibi meruerit; sed si generalia principia de merito observentur, et commode applicentur, non est quod in hac re amplius immoremur. Nam singularis illa quæstio, an B. Virgo aut

incarnationem, aut dignitatem matris Dei meruerit, in priori tomo, disp. 10, sect. 7, diligenter tractata est; de gloria vero, quam sibi Virgo promeruit, infra est dicendum. Præter gratiam autem et gloriam, nihil est quod per se cadat sub merito, nisi quod ad illas per se ordinatur, aut per se est cum illis conjunctum. Denique de merito B. Virginis respectu aliorum, an, scilicet, aliis etiam meruerit, non nihil in hac sectione attigimus, et superius tractantes de merito incarnationis. Constat enim de condigno nihil meruisse nobis B. Virginem, quia est proprium privilegium Christi; de congruo vero merendo incarnationem, magnum bonum nobis promeruit, et dum vixit, potuit etiam multa bona aliquibus hominibus mereri. An vero aliquid amplius nobis meruerit dum hic viveret, aut nunc etiam nobis mereatur, vel saltem impetrat, infra disputandum est, disputatione 23, sect. 1 et 2.

DISPUTATIO XIX,

In sex sectiones distributa.

DE SCIENTIA ET SAPIENTIA QUAM B. VIRGO IN STATU VIÆ CONSECUITA EST.

Quæ diximus de gratia sanctificante Virginis Beatae, communia sunt omnibus virtutibus Theologicis et moralibus, et Spiritus Sancti donis, quæ cum eadem gratia connexa sunt; unde explicando perfectionem hujus gratiæ et meritorum Deiparæ, excellentiam, quam in his omnibus virtutibus habuit, explicatam reliquimus; et obiter nonnulla adduximus de frequentissimo usu ac fere continua eorumdem exercitatione. Quapropter nihil amplius de illis dicendum occurrit. Solum ergo superest ut de intellectualibus perfectionibus atque gratis datis sermonem instituamus; de prioribus in hac disputatione, de posterioribus vero in sequenti disserendo.

SECTIO I.

Utrum B. Virgo habuerit in hac vita perfectam divinarum rerum cognitionem.

1. Principio ponendum est, quamdiu Deipara vixit in corpore mortali, non fuisse beatam secundum animam (ut ostendimus supra, disput. 4, sect. 1); utor autem beatitudinis nomine, ut indicem non habuisse stabilem ac permanentem visionem; an vero habuerit interdum illam in raptu, dicemus disputatione sequenti.

2 Ex hoc autem principio, necessario sequitur habuisse in hac vita fidem mysteriorum Dei (ut eadem disputat. 4, sect. 7, dixi), quia fundamentum sanctitatis et justitiae in viatore est fides; sed B. Virgo, quamdiu fuit in corpore mortali, fuit viatrix et sancta; ergo per fidem semper ambulavit, quia sine fide non potuisset placere Deo; et ideo Lucæ 2, beata prædicatur, quia creditit.

3. *Virginis fides perfectissima.* — *Objectio.* — *Responsio.* — *Dubium primum.* — Ex quo ulterior manifestum est hanc fidem in Virgine fuisse perfectissimam, tum ex parte subjecti in quo fuit valde intensa, et prorsus certa, omnem motum etiam primo primum dubitationis excludens; tum ex parte objecti, quia per illam distinctissime creditur mysteria Trinitatis et incarnationis, et reliqua omnia quæ ad divinitatem et humanitatem pertinent. Ita docent Patres, Ambrosius, lib. 2 de Virginibus, et lib. 2 in Lucam; Epiphan., ser. de Laudibus Virginis; Augustinus, ser. de Assumptione; Bernardus, ser. 35 in Cantica, circa finem, et in lib. de Passione Domini, qui inter ejus opera habetur, c. 2; Rupertus, fere toto lib. in Cantica. Unde Abulensis, parad. 1, c. 31, dicit propter hanc fidei perfectionem vocari Virginem ab Augustino, et Bernardo, matrem credentium. Ratio autem sumenda est ex principiis supra positis. Ostendimus enim B. Virginem habuisse omne donum, omnemque perfectionem gratiæ sanctificantis, quæ Angelis vel hominibus communicata est; imo et excellenti modo; tota autem hæc perfectio fidei ad dona gratiæ sanctificantis pertinet. Deinde ostendimus in B. Virgine fuisse in omni genere virtutis excelliam sanctitatem; sed fides est fundamentum justitiae; ergo debuit infundi in perfectione proportionata tantæ sanctitati et justitiae. Præterea ostendimus in B. Virgine nullum fuisse inordinatum motum in aliqua potentia ipsius; ergo nullum dubitationis impulsu aut motu passa est. Denique, agentes de ejus innocentia, eximiam fidem quam in filii conceptione, passione ac morte habuit, aperte demonstravimus. Blasphemavit igitur Lutherus, qui fidem centurionis Mariæ fidei preferit, eo quod Matth. 8, de centurione dixit Christus: *Non inveni tantam fidem in Israel.* Eo tamen loco non comparat Christus centurionem cum omnibus ac singulis qui ex populo in ipsum crediderunt; hoc enim modo, non solum fides Virginis, sed etiam Simeonis et Annæ, Josephi et Joannis Baptiste, et Ma-